

04- Feb.- 2026

समां - 12:25 hrs.

<><><><><><>

Railway Projects Halted

सेऊएं दे बागे ते मकामी अर्थबवस्था गी ध्यानै च रखदे होई ते चुनी गेदी सरकार ते मकामी नुमायंदें आसेया पेश कीती गेदी चिंताएं दे मगरा केन्द्र नै जम्मू-कश्मीर च त्रै प्रस्तावत त्रै रेलवे परियोजनाएं गी फिलहाल रोकी दिता ऐ। केन्द्री रेल मंत्री अश्विनी वैष्णव हो'रें आखेया ऐ जे इक विस्तृत सर्वेक्षण दे बाद बागें गी होने आहले संभावित नुक्सान बारे पता लग्गा ऐ। इस करी इ'नें परियोजनें गी फिलहाल बंद करी दिता गया ऐ। इस फैसलै दा राजनीतिक पार्टियें ते मकामी हितधारकें सुआगत कीता ऐ। उ'नें आखेया जे इस कन्नै करसानें दे हितें ते संभावित नुक्सान कोला बचाऽ होग। मुखमंत्री उमर अब्दुल्ला हो'रें इस फैसले दी सराहना कीती ते मकामी चिंताएं गी समझनें लेई रेल मंत्री हुंदा आभार जताया।

<><><><><><>

LA Proceeding

जम्मू-कश्मीर विधानसभा च अज्ज उपराज्यपाल हुं'दे सम्बोधन पर जारी धन्नवाद प्रस्ताव उप्पर चर्चा होआ करदी ऐ। एदे शा पैहले सोआले दे समें दौरान मुखमंत्री उमर अब्दुल्ला, उपमुखमंत्री सुरेन्द्र चौधरी ते खेड्डु मंत्री सतीश शर्मा हो'रें विकास बाद्दे आले बक्ख-बक्ख मामलें पर अपना पक्ख सदन दे अग्रे रक्खेया। तोंआई मुखमंत्री उमर अब्दुल्ला हो'रें अज्ज 2 महत्वपूर्ण बिल सदन च पेश करगंन। इक बिल च कारोबार करने च सौख आस्तै उसी अपराधमुक्त ते तर्कसंगत बनाने लेई किश कनूनें च संशोधन करने लेई पेश कीता जाग ते दुए बिल दा मकसद कोढ करी प्रभावत लोकें कन्नै फर्को-फर्की खत्म करने ते सकारात्मक कारवाई दे राएं बरोबरी आले बरताऽ गी यकीनी बनाना ऐ। एह दौनें बिल पैहले गै सरकारी Gazette च प्रकाशित कीते जाई चुके दे न।

<><><><><><>

CM –RTC Busses

मुखमंत्री उमर अब्दुल्ला हो'रें बक्ख-बक्ख धार्मिक थाहरें लेई जे एंड के रोड ट्रांस्पोर्ट कारपोरेशन दियें बसें गी कल एम.ए स्टेडियम जम्मू थमां झंडी दस्सियै रवाना कीता। एह विशेष बसां श्रद्धालुएं गी Shahdra Sharief- Jwalaji- Mc Leod Ganj च Namgyal Monastery, श्री आनंदपुर साहिब ते अजमेर शरीफ वगैरा थाहरें पर लेई जागंन। इस मौके पर बोलदे होई मुखमंत्री हो'रें आखेया जे इय्यै जनेह जत्त जम्मू-कश्मीर च- लोकें आसेया इक दुए कन्नै मिलियै रौहने ते इक-दुए प्रति हिरख-प्रेम आहली भावना गी दर्शादि न। इय्यै जनेई गैंऽ एकता- आपसी भाई-चारे- अन्तर राज्यीय राबते ते सैलसफे गी बढावा दिंदी ऐ।

<><><><><><>

Encounter Udhampur

उधमपुर जिले च सुरक्षाबलें ते आतंकवादियें बश्कार कल उसलै इक टाकरा होआ जिसलै इलाके च आतंकवादियें दी मौजूदगी बारे थ्होई दी इक टकोहदी सूह पर कारवाई करदे होई सुरक्षाबलें आसेया सांझा तपाशी अभियान चलाया गेदा हा। फौज दी व्हाईट नाइट कोर नै सोशल मीडिया दी इक पोस्ट च जानकारी दिती ऐ जे सेना दी CIF डेल्टा- जम्मू-कश्मीर पुलिस ते सी.आर.पी.एफ आसेया सांझे तौरा पर अभियान चलाया गेदा हा ते कल संजा 4 बजे सुरक्षाबलें ते आतंकवादियें बश्कार गोलीबारी होई ही।

<><><><><><>

Pending Compensation

जिला प्रशासन जम्मू नै इक बड्डी उपलब्धी करदे होई 2022 थमां लेइयै सारे सिडक हादसें दे मुआवजें आले बकाया पेदे मामलें गी नबेडी दिता ऐ। साढे जिला संवाददाता दी रिपोर्ट मुजब डिप्टी कमीशनर राकेश मिन्हास हो'रें दस्सेया जे प्रभावत परोआरें गी तकरीबन इक करोड़ रुपें दी रकम सीद्दे लाह दे तौरा उप्पर वितरण जारी दिती गेई ऐ। मीडिया आहलें कन्नै गल्लबात करदे होई उ'नें आखेया जे बकाया पेदे 107 मामलें दा नबेडा कीता गया ऐ- जेहदे चलदे आर.टी.ओ दफ्तर च हून कोई बी मामला बकाया नेंई ऐ। जिला मैजिस्ट्रेट होरें ट्रैफिक पुलिस ते मोटर-गड्डियें सरबन्धी मैहकमे गी निर्देश दिता जे ओ गड्डियें सरबन्धी अपने अभियान तेज करन।

<><><><><><>

Prog. Announcement

आकाशवाणी जम्मू दा क्षेत्रीय समाचार एकांश, अज्ज दपैहरी साढे 12 बजे कैंसर सरबन्धी अंतरराष्ट्री ध्याड़े दे उपलक्ष्य च 30एं मिंटें दे इक बशेश कार्यक्रम दा प्रसारण करोग- जेदा विशेसार होग कैंसर, एहदे लक्षण, कारण ते इलाज। इस बशेश कार्यक्रम च स्थाडियां परौहिनयां होडन सरकारी मेडिकल कॉलेज जम्मू दे रेडिएशन ऑनकालजी विभाग दियां असिस्टेंट प्रोफेसर डॉ. संदीप कौर- जेहिडियां इस विशे पर अपने माहिराणा बचार सांझे करडन। इस कार्यक्रम दी मेज़बानी साढे न्यूज़ एंकर जगमोहन शर्मा आसेआ कीती जाहगा।

<><><><><><>

Weather

मौसम विभाग नै जम्मू-कश्मीर च अगले इक हफ्ते तोड़ी मौसम आमतौर पर खुश्क रौहने दी पेशगोई कीती ऐ पर उच्चियें धारें पर मौसम च किश बदलाव होई सकदा ऐ। विभाग नै अज्ज शमान आमतौर पर साफ रौहने दी पेशगोई कीती ऐ पर 6 फरवरी गी रातीं लै किश उच्चियें धारें पर हलकी बर्फबारी होई सकदी ऐ। 7 ते 8 फरवरी गी मौसम आमतौर पर खुश्क रौहगा। उआं 9 ते 10 फरवरी गी किश थाहरें पर हलकी बरखा ते बर्फबारी होई सकदी ऐ। एदे मगरा 11 ते 12 फरवरी थमां मौसम फही आमतौर पर खुश्क गै रौहगा।

<><><><><><>